



Sabtu, 20 Pebruari 2021

Ogen: Jeremia 48:26-39



Runtuh Kemulianna



Moap eme sada bangsa arah sinursur Lut ras anakna sintua tupung ia ibere minem seh mabuk. Bangsa Moap i bas sejarahna nembah berhala-berhala. Janah megati ndube erperang ras kalak Israel, khususna sanga bangsa Israel mentasi negerina.

Tapi lit nge turi-turin si mehuli i bas negeri Moap nari eme kerna Rut beru Moap si erkeleng ate man bibina Naomi si mulih ku Betlehem.

I bas ogenta sendah maka Moap enda ndatken ukumen Dibata. Si enda erkiteken Moap megombang dingin seh kal iakapna ganjangna bana. Si e teridah arah rananna dingin lagu langkahna la erpepah. Ukumen biasa idabuhkan Tuhan adi kejahatan sada bangsa enggo genep. Ertina enggo kuh kejahatenna si ilakokenna i bas kegeluhenna. Salah sada kejahatan si ilakokenna eme "mpersembahkan anak-anakna jadi persembahen gelehen."

Amin bage pe situhuna keleng kal ate Dibata ngenen ia. Si enda teridah ayat 31, Ngandung Aku erkiteken kerina kalak Moap. Bage pe ayat 36, cedakal ateKu ngenen Moap nina Dibata. Tuhu runtuh kemulian Moap erkiteken kejahatenna. Maka lit kemulian i bas sada bangsa eme erkiteken ibere Dibata man bana. Tapi bage Dibata lanai erngena ate erkiteken kejahatenna maka bene me kemulian sada bangsa e. Arah turi-turin kegeluhen Moab enda mabai kita ngidah ras ngerenung kerna dirinta. Mulia, mehaga, medolat kita erkiteken ibereken Dibata e rangan ibas dirinta. Janah kerina e arus sijaga gelah la bene ntah pe runtuh. Carana tentu alu ndalanken si ngena ate Dibata, e nge ngenca si pentingna i bas kegeluhen enda. Sabab arah e sijaga ras sidadhken kemulian e.

Ulu Kemulian eme Dibata, emaka dalankenlah si ngena



06 Januari 2021

Ogen: Jeremia 48: 40-47

Lanai Terbuali Dibata PusuhNa



Kai ulu maka jadi ukumen man Moap. Salah sadana siituriken ijenda eme perban ia ngelawan Dibata. Adi si bandingkan ras kata-kata nabi Amos kerna bangsa enda maka ije ituriken uga kejamna bangsa enda nandangi kalak si deban. Ituriken maka tulan-tulan imbangna si enggo mate pe itutungna ulihi. Nuriken uga kejamna ia i bas kegeluhenna.

Adi manusia ngelawan Dibata maka la lit dalanta pulah. Erdandanken si e maka sada si la banci lang idalanken manusia eme nggeluh bagi si ngena ate Dibata. Ije me maka ijumpai manusia kedamen si tahu-tuhu i bas tengah-tengah kegeluhenna.

Tapi Dibata la banci mbuali ise IA. Maka teptep bas rawaNa pe tetap nge teridah keleng ateNa man kerina manusia termasuk kalak Moap enda. Labo ngatakenca adi pilihNa Israel maka bangsa e ngenca ateNa keleng. Lang. Tangkaskal ituriken i bas Pustaka Si Badia maka kerina tinepaNa keleng ateNa. Bangsa Israel ipilih guna banci jadi terang man bangsa-bangsa (Jes.42:6). Jadi, guna engkelengi kerina bangsa nge maka ia ipilih.

I jenda pe ndai si idah i bas ayat 47 maka Dibata erjanji maka i bas wari si reh ipehuliNa mulihi Moap alu mereken kemakmuren man bana. Bage me pusuh Dibata nandangi kerina kita manusia maka i bas rawaNa e pe tetap teridah keleng ate si tetap. La terbualisa pusuhNa. Bali ras rawa nande nandangi anakna maka la pernah pulah i bas keleng ateNa.



27 Februari 2021

Ogen: 1 Korintus 13:1-8a

Keleng Ate




Paulus namaken keleng ate palas kerina perbahanen manusia. Kai pe si ibahan manusia adi labo palasna keleng ate maka e sia-sia. Ertina la lit ertina. Kebeluh-en-kebeluh-en si lit, umpamana ngerana, ernubuat kerina e bagi gung si erbulnang tah penganak si erdeping. Kenca ersora la lit bekasna.

Malah i bas ayat seterusnya nina Paulus, bicara kusumbangken pe kerina erta-ertangu, janah bicara kukorbankan pe diringku seh mate guna ndatken kemegahen, tapi adi la aku erkeleng ate nandangi kalak si deban labo lit untungna man bangku. Ertina la lit ertina janah sia-sia. Bage me pentingna keleng ate si mpalasi kegeluh-en manusia.

Jenari lit iban Paulus tanda-tanda kalak si erkeleng ate eme megenggeng, mehuli, la percian, la meganjang ukur, la sombong. Ia labo mekarus, la ncariken untung man bana saja, la pergelut, la ngkira kesalah-en kalak. La meriah ukurna adi kalak erbahan si jahat, tapi ikut ermeriah ukur i bas si benar. Kalak si erkeleng ate ngasup nggengken kai-kai pe, tek maka lit si mehuli i bas kerinana, tetap erpengarap-en dengen saber i bas kai-kai pe.

Ertina maka kalak si enggo nggeluh i bas keleng ate eme kalak si enggo menang i bas dirina. Menang i bas ertina lanai bo ia nggeluh guna dirina tapi nggeluh guna kalak si deban. I bas kai pe ia erbahan si mehuli dengen uga maka erguna ras ernanam ia man kalak si deban. Maka banci kita nggeluh i bas si e sada ngenca kuncina eme nggeluh i bas kita i bas Tuhan sabab IA ulu keleng ate si la pernah erkeri-kerin.

 Kalak si erkeleng ate eme kalak si enggo menang



Blank writing area with a wavy top edge.